

榮縣志

212.80.73

36

212.80.73



光緒丁丑年鑄

榮縣志

本衙藏板

重修縣志序

邑志修于前令許匯泉甫三十餘年今可不修余寡學識亦不必修天下事有可已而不已可緩爲而不得不汲汲以爲者良有故焉衙中僅存縣志一冊甲辰歲學使蔡公按試嘉定徵各屬邑乘以往欲再印數部吏白

舊板朽壞三十餘頁乃聚紳士共議補足且采輯後來者續增亦至便也僉曰然設局召匠謀剗刷矣董其事者來告曰舊志各門首尾蟬連不絕新增者無從插入非全行翻刻不可邑人聞修志成踴躍捐貲所費亦易集於是奮然修志采訪纂輯分



任其責邑人廖君扶九主講鳳
鳴書院張君海雲主講桂林書
院朝夕共事較前志略有更訂
大都仍舊閱八月而告成余撫
卷歎曰夫志豈徒載一邑故事
已哉我

國家休養生息从道化成蓋二百
年於茲矣深山窮谷之民黃髮

垂髫莫不涵泳

聖涯沐浴膏澤蜀處西南一隅而桑
麻沃野號稱天府食德服疇遠
邁三代之隆於戲盛哉榮雖蕞
爾邑按其版圖考山川之廣狹
辨土田之肥瘠生計何以周焉
審道里察市廛物產所宜工商
所資財用何以阜焉科第有盛

衰婚祭有奢儉風俗何以醇焉
村疇棊布烟火相接宵小何以
弭焉此皆有司之責而胥考於
志志安得不重或者謂天時有
乖違人事有變遷數十年間今
昔亦不無少異徒據故紙何異
膠柱鼓瑟顧轉移補苴貴隨時
措置譬如善弈者不必按譜下

子而正變諸局必備觀覽今各
上憲孜孜求治日以除莠安良
撫綏百姓爲急務余不敏自愧
才同韞線不敢不勉力從事尤
願邑中賢士大夫躬爲表率型
方勵俗下至椎魯之夫去囂凌
敦任卹行見忠孝節烈志不絕
書康樂和親風氣日上

聖天子涵育之深恩各

大憲殷殷圖治之美意共期無
負是則予所日夜望之者也梓
畢邑人請序卽以是著於篇
道光二十五年歲乙巳十二月
知榮縣事王培荀撰

原序

康熙二十五年

邑令 朱大任

邑之有志蓋舉一邑之所有而籍記之所謂邑乘是也其大者如山川之險夷瀦洩風俗之美惡醇疵以及民數之登耗賦役之繁簡與夫仙釋之廬臺榭之址達官貴人之墟墓騷流墨客嘯咏風雅之辭無不備載凡皆經世者之所蚤夜盡心以垂諸典冊而使後之人有所考以鑒觀得失興起治政誠重典也榮於嘉陽爲屬邑其得各自爲志由來舊矣顧當兵燹之餘殘缺失次官斯土者未免致嘆無徵用深興廢之感焉幸於

今上御極之廿有四載屬當編纂通志而榮志於是例得修

榮縣志

序

一

維時高陽韓君實任其事君爲人才敏而慮周於政殆無不舉蓋亦所謂能盡其心者第是筆削宜謹而任與議不能不有所分掌爰以屬邑之孝廉劉君使載筆焉劉君嫻文辭習典故彬彬有國史才用本韓君之意旁蒐博采而斷以己見於凡邑之所有者類無不有且節錯絲棼詳略井井皆可爲後來治邑者之所準據洵足稱一邑之全書百代之信史矣後之人誠能按籍而稽踵事增華將使興者日益興而廢者不至於終廢則斯書之有關治政豈淺鮮哉余以奉委代庖適履韓君後會茲書告成授梓而劉君問序於余余方愧毫無可紀

應謝不敏然竊以有事斯土又幸遇是書之成何可竟
默無一言以去於是遂不辭而略爲之序

原序 康熙二十五年

邑令 易其極

丙寅初余奉

簡命承乏茲土下車甫旬日而邑之孝廉劉君卽以新修邑乘授余竝請序焉蓋是書之成也欽

九重之綸音奉 各憲之令檄校於高陽韓君定於富川朱君而旭川劉子則爲之廣蒐博采凡山川之瑰異陂池臺榭之崇觀與夫博學鴻文忠孝節烈儉簡勤樸無不詳錄而備載焉余展而讀之其事周以慎其文質以確其義微以著爲一邑信史誠盛舉也余踵韓朱二君後又重以劉子之請敢不弁言於簡端余惟志誌也志志

樂 縣 志

序

也將使嘉言懿行無淪落傷爲昔人計長从乎而不盡然也抑使後之人聞風而思慕思慕而興起端我志以繼前人志是則作志意也然則觀斯志者謂山川瑰異非舊乎若之何陂池臺榭有廢興之感焉爲問博學鴻文忠孝節烈儉簡勤樸流風餘韻猶有存焉否耶方今大化維新薄海晏如入其疆而無征繕遣戍之煩也無簿書期會之擾也士民耕鑿絃誦魚魚休養生息咸沐浴於聖朝之深仁厚澤則後此之聞風而思慕思慕而興起端我志以繼前人志其可書者正復不少也余與劉君敬磨墨以俟

原序 康熙二十五年

劉世璋

郡邑志徧海內皆然所以稽星野載疆域諸如賦役之多寡戶口之登耗物產之盈絀人文之或隆或替風俗之或臧或否忠孝廉節之或先或後官斯土者或良或窳無弗曉若列眉宜志不越數十年而一修也不然文獻無徵後之信耳者徒聞悠謬之談豈不爲一代缺略事哉榮歷唐以來纂志代有姓氏明萬歷甲戌續修後距今一百一十有二年矣崇禎丙子邑人簡先生勅曾增修之其閒斟酌悉善或昔無而今有或前略而後詳一一彙刊成書洵足以備參觀佐國史者無何甲申來

榮縣志

序

一

酷於兵燹雖有鄴架亦不免焉區區邑志存者幾希歲癸卯春日山遊忽得甲戌抄本於農家喜不自禁惜乎毀於風雨蟲鼠類多殘缺又不無往跡湮沈之感甲子秋邑侯韓公訪余邑志余曰廢簾中有抄本四卷亂離後所僅得者編摩之亦可爲吾榮一部掌故觀公借覽之見精而核嚴而有體旋有志於校刊會公冗遂寢其事近奉 部咨纂修明史 憲檄屢下取邑志公屬余刪訂以授梓余曰茲志也昔人綜核名實備經去取何敢以弁鄙之識爲增削哉不過失次者序殘缺中差爲訂補焉耳書成未付梨棗而公內擢仙井邑侯朱公

吾邑畱心於風土民物慮遺良隱德之士志有未收者
俾再加蒐輯余曰志榮於滄桑之餘惟星野疆域如故
其城郭之荒廢也土田之榛莽也賦役戶口人文物產
諸要務不能存什一於千百矣余生也晚忠孝廉節閒
嘗訪之故老稽之遺書見聞所逮不過數人考證無據
者不敢附入闡微彰幽期以徵信至於秩官科目例得
連類及之余與張子容同諸庠士輯略僅如此迨夏四
月楚玉沙易公履任公洽聞博物不減鄭僑晉向齋閱
索公序與韓朱二公竝耀簡冊及閱畢而出序授余曰
三榮文物已敬悉之矣但名宦諸公若存名而實蹟不
載毋乃有遺憾乎余唯唯知公倣先型而修政教端在
茲志矣爰卽往事可稽者采錄以副公表章先正之志
倘更求甲戌後廣搜無遺尙俟諸淹雅者

原序

乾隆二十一年

邑令黃大本

辛未夏四月余承乏榮篆竊不自揣以興舉廢墜爲己任伊時塵案如絲日不暇給至秋八月少得就理每延見邑中紳士輒咨訪遺聞思欲補輯縣志都人士僉以榮志荒略得諸煨燼之餘其書不足觀外閒亦不易構爲辭後從吳生允觀處出一編示余知自

聖祖仁皇帝御極之二十有五年邑孝廉劉君世璋得抄本於農家稍加之以潤色書凡四卷條類秩然終不免世遠年湮文獻無徵之慨今更越六十有七年矣土地之荒闢疆域之廣隘生齒之登耗賦役之繁簡民俗之醇漓

榮縣志

序

文章之華僊及一切因革損益後先大有逕庭是皆有政教存乎其間非與世浮沈之子所可輕心掉臂而失之者也余學識謏劣愧不克載筆以輝映山川第念榮爲嘉陽劇邑素推難治而前志稱爲民多樸實士尙詩書又云民淳事簡可以道化其所載理學經濟之儒忠孝節烈之事皆足以經緯天地感泣鬼神卽官斯土者之情慙教養政績可紀每以單詞片語紀之雖曰荒略其大指固已不磨余願效法前哲之善政善教以整齊夫榮民尤願表彰前代理學經濟忠孝節烈之照耀史冊者以化導夫榮民則榮志奚敢不輯况生逢

聖朝德化翔洽各

上憲整躬率屬嘉興維新榮雖五方雜

沓亦旣士遊於庠農安於野熙熙皞皞比戶可封安見
古治之不更見於今日哉余蒞任五年於茲所爲興舉
廢墜之績尙茫無所據至采輯縣志之責業身任而不
辭凡出入所經歷耳目所聞見或訪諸耆英或詢諸野
老或徵信於文移或取材於碑碣魯魚亥豕之辨悉心
考校載易星霜凡有關於理學經濟忠孝節烈之舉莫
不黽勉從事樹之風聲俾前哲之流風餘韻宛在目前
四境之田里樹畜瞭如指掌書仍四卷櫟括無遺冀無
負乎纂輯邑志之初願今志已告成曾無所就正以考
鏡其得失所恃以告無罪於前古後今者惟此懃懃懇
懇之意從殘缺失次之緒餘力臻完美差足備參考資
采擇而已矣因援筆而爲之序

邑令許源湖南湘潭舉人

原序

榮爲古名勝地牧斯土者代有賢良唐樊侃守榮州蘇頲稱其敏以邀功斷而臨事宋之李旼捐鹽額還雜役以利民德之頌曰來蘇至陸務觀爲政風流公餘吟咏膾炙人口而劉蔚嘗以錦里耆舊傳詞多蕪穢改爲成都理亂記洵卓識也晁公武則手編郡齋讀書志每終篇輒論其大旨所發明有足觀者予不敏一行作吏此事遂廢而於政治民生又未能希冀前徽萬一旣以羨古人之仕優則學而深愧予之無能爲役也予宰茲土已十稔矣下車日檢閱邑乘知纂自康熙閒劉孝廉

榮縣志

序

世璋而劉藍本乃得之農家不無因陋就簡以訛傳訛乾隆中邑令黃大本重輯四卷迄今又越數十載無論其中郢書燕說帝虎魯魚卽此數十年來地里之遷仍建設之廢立官師人物之謝興與夫戶口賦役之增損已非一致矣倘志之不脩何以參稽故事考鏡得失標往昔而詔來茲以爲一邦文獻徵乎然志者史之端也備物昭軌傳信爲難是必資采擇於遺文博訪求於父老目見耳聞从从彙爲成冊庶無不純不備之憾况榮前代或爲藩鎮或爲州爲府固西南一大都會豈一目張羅寸莛起音所能率爾操觚者耶故亟欲脩之而未

敢漫焉從事會今春 大府奏脩四川通志報

可檄取各屬志書因見其書疎漏舛錯不足傳信爰於公
餘細加叅訂訛者正之蕪者刪之謬者剔之缺者補之
彙爲成帙爲卷十爲條五十有八所謂遷仍廢立謝興
增損之不一致者皆釐然秩然雖不敢謂醇而無疵然
較前之疎漏舛錯十得五六矣夫脩志乘有司所有事
也乃十年來始克遂茲初志良以已非作史才而樊李
晁陸諸公又皆炳炳麟麟焜耀史冊予未能追美前徽
僅以區區是書謝不敏於古人益滋愧矣 嘉慶十有
七年壬申仲冬月

原敘

郡守 宋鳴琦 江西奉新進士

曩余於壬戌歲纂修府志榮邑則有康熙年邑孝廉劉世璋所纂一冊乾隆中黃令大本所纂四卷類皆因陋就簡以譌傳譌蓋兩書相距七十餘年而劉志則得之農家抄本其閒風土人情與今不無少異卽疆域賦役亦各損益不同似皆難以傳信余采取入志爲證正者十之二三而於擁思茫水更復彙萃羣書辨之尤爲詳晰其零星例不入選者姑仍之因思榮爲嘉陽劇區唐宋世作藩鎮歷宋一代登進士者百五十餘人他如王氏勾龍氏明之胡文愍公後先競爽人文炳蔚勾演又

榮縣志

序

一

復編次圖經當必有一代成書永傳文獻何竟寥寥無可取法孔子曰文武之政在方策又曰足則吾能徵之是兩書之未盡善者或緣明季兵燹之餘文獻無徵亦未盡作者之過也丙寅辛未歲余因公兩過其地見夫山川之融聚人物之俊良謂必有耆儒碩彥特出其閒而匯泉明府適宰是邑明府爲楚南名孝廉長於吏治文章下車來百廢具舉而獨於志乘猶有待者何居明府之爲言曰志者史之端也備物昭軌傳信爲難前者旣以滋疑繼者不容蹈轍是必資采擇於遺文博訪求於父老目見耳聞久之彙爲成冊庶無不純不備之憾

噫明府之用心亦良苦矣今年冬以書成問序於余余
不文然曾備員儀部凡直省之以志達史館者必由部
轉因得厯覽天下郡縣各志總其凡舉其要故於茲事
自謂有一得焉書來急擷而讀之爲卷十爲目五十有
八通計十萬餘言義例謹嚴亦博亦約洵不愧作史才
昔真西山嘗云爲此邦吏者不可無是書朱子知南康
軍下車卽詢郡志欲一方之風土人情熟悉於中斯有
以勸善懲惡論者以爲知本明府履任於今十年矣乃
獲成是書而其心則自下車日基之他日榮之人士讀
其書論其世皆必爭自濯磨以思躋乎唐宋之盛當亦

榮縣志

序

二

此志爲之先路也 嘉慶十有七年歲次壬申孟冬月